

Merr kann nit alles gewinne

On Silvester fällt oom immer widder uff wie schnell so e Jahr erumgonge iss. Unn weil e Jahr je schneller erum iss je älter merr werdd, hawwe aach mir uns om letzde Daach im Alte Jahr, derrweil unser Mädcher de Kaffeedisch bei uns dehoom gedeckt hawwe, driwwer unnerhalle.

De Karl hott gesacht: Dass so e Jahr so schnell vorbeigiehet, dess hängt moiner Oosicht nooch doodemett zesomme, dassmerr alleweil Termine hott. Doo sinn runde Geburtsdaache, Goldene Hochzeit unn die Owende von de Vereine, doo mussde ins Kronkehaus ooner besuche odder musst selbst zum Dokter, doo issemol zu de Kinner ze fahrn odder im Haus was ze mache – wenn Mondaach iss waaßde schunn, wassde bis Freidaach zu mache host unn wenn de Erste iss waaßde schunn genau, wo de om Letzde unbedingt soi musst. Unn weilde alsfort uff de Kalenner guckst giehet die Zeit so schnell erum, doo konnsde nix droo mache. Was moonden ihr?

De Schorsch hott genickt. Wissder noch als mir Kinner warn? Wie long hott dess gedauert vom Ersde Advent bis Weihnachte – dess war ewich long. Mir Kinner hadde halt nix ze mache, mir hadde nor ze warte. Awwer heit mussde alles selber mache, kooner iss doo der dir was abnimmt. Dess isses, dassde als mehr Termine host unn oihalle musst. Außerdem willsde, dass de Winter schnell vorbei iss weechem heize, dass bald Pingsde kimmt weeche doine Blumme im Gadde unn unn dasses hoffentlich bald Herbst werdd, weil du dann e schee Schiffsreis mache willst – immer gucksde nooch vorne. Unn mir nix dir nix flieche die Monate unn die Jahreszeite on dir vorbei. Isses nit so, Honnes? Ich habb dene zwaa zugestimmt. Ich denk, so wie ihr dess saacht, so stimmt dess. Ich habb merr aach schunn vill Gedonke doodriwwer gemacht. Desweeche habb ich ab unn zu probiert, wenichsdens e Woch e bisje länger ze mache. Unn monchmol hotts aach geklappt.

Frächt de Schorsch: Ich bin emol neugierisch – wie mächsden dess?

Ich sach: Also wenn ich - saache merr emol - on emm Mittwochmoie wach werr denk ich mir, heit iss Dunnersdaach. Unn von doo ab iss in moim Kopp Dunnersdaach bis owends, wenn ich mich ins Bett leech. Unn wenn ich om nächsde Moie wach werdd, dann iss joo erst Dunnersdaach - unn gleich waaß ich, den Daach hosde gewunne.

In dem Aacheblick hawwe uns unser Mädcher on de Kaffeedisch gerufe, awwer de Schorsch hott noch schnell gemoont, dess missder aach emol probiern.

Om letzde Sunndach iss dann de Schorsch wie wild on de Stommdisch kumme unn noch bevor er sich gesetzt hott, hotter schunn geschennt: Widder bin ich uff so e bleed Idee vom Honnes enoigefalle. Habb ich merr doch om Mittwoch moie vorgestellt ess wär Dunnersdaach unn habb dess dorchgehalle bis owends. Unn ich muss saache, om nächsde Moie kam merrs wirklich so vor als hätt ich enn Daach gewunne. Bis merr oigefalle iss, dass ich vergesse hatt, moin Lottoschoi abzegewwe. Unn grad on dem Mittwoch hätt ich drei Richdische gehabt. Honnes, ich kriehe von dir neun Euro verrzich. Awwer ich habb nor gelacht. Nix gibts! Schorsch, merr kann nit alles gewinne, enn Daach unn aach noch Geld.

Eiern Honnes